

Andrew Slade
Cyfarwyddwr Cyffredinol – Grŵp yr Economi, Sgiliau a
Chyfoeth Naturiol
Llywodraeth Cymru

29 Mawrth 2019

Annwyl Mr Slade

Caffael Cyhoeddus yng Nghymru

Diolch i chi am ddod i sesiwn y Pwyllgor ar y Gwasanaeth Caffael Cenedlaethol (NPS) ar 18 Chwefror 2019 ac am eich gohebiaeth ddilynol.

Mae'r Pwyllgor yn nodi bod swm y gwariant drwy gontractau a reolir gan yr NPS wedi parhau i gynyddu, gan gynhyrchu incwm ychwanegol i leihau'r ddibyniaeth ar gronfeydd wrth gefn Llywodraeth Cymru. Fodd bynnag, mae'r Pwyllgor yn pryderu nad yw model presennol yr NPS wedi ennill tir i'r graddau a ddisgwyliwyd.

Mae'r Pwyllgor yn nodi o'ch gohebiaeth fod y costau a fuddsoddwyd mewn datblygu a rhedeg yr NPS yn annhebygol o gael eu gwaredu'n llwyr drwy symud i fodel newydd. Nodwn hefyd fod yr NPS wedi cyfeirio at fuddion i'r sector cyhoeddus ehangach o'i waith, a'i fod wedi ymgymryd â gweithgarwch caffael a fyddai, yn ôl pob golwg, wedi arwain fel arall at gostau gweinyddol ychwanegol i rannau eraill o'r sector cyhoeddus.

Fe wnaethoch gydnabod yn eich tystiolaeth fod gwersi i'w dysgu o'r profiad hyd yma gyda'r NPS wrth i chi symud ymlaen gyda chaffael cyhoeddus. Credwn hefyd fod gwersi ehangach i Lywodraeth Cymru eu dysgu a fydd yn berthnasol i feysydd eraill o ddatblygu a gweithredu polisiau yn y dyfodol a rôl gyffredinol Llywodraeth Cymru o ran arwain systemau wrth weithio gyda chyrff cyhoeddus eraill. Byddem yn annog Llywodraeth Cymru i gasglu a rhannu'r gwersi hynny ar draws y sefydliad i geisio osgoi problemau tebyg yn y dyfodol.

Nid ydym yn glir faint o ystyriaeth yr ydych wedi'i rhoi gyda'ch sefydliadau partner ynglŷn â'r model cyflawni gorau posibl ar gyfer contractio sector cyhoeddus canolog yn y dyfodol, gan gadw swyddogaeth genedlaethol weddilliol a dibynnu ar raddfa a



Ileoliad posibl hyn, rydym yn credu bod gwerth mewn ystyried manteision ac anfanteision adeiladu ar swyddogaeth gaffael bresennol Partneriaeth Cydwasanaethau GIG Cymru. Byddem yn croesawu'r wybodaeth ddiweddaraf am y model cyflenwi newydd pan fydd wedi'i bennu, a phan fydd y cynlluniau gweithredu wedi'u cadarnhau, gan gynnwys asesiad Llywodraeth Cymru o unrhyw gostau trosiannol.

Mae'r Pwyllgor yn parhau'n bryderus am gyflymder y gwaith yn y maes hwn ac ar yr un pryd parhau i ymgysylltu â rhanddeiliaid yn effeithiol. Roedd ehangder posibl y materion yr oedd angen eu hystyried yn adolygiad yr NPS / Gwerth Cymru, a hynny mewn cyfnod heriol ar ôl dechrau araf, yn glir yn ein sesiynau tystiolaeth yn 2018. Roedd yn amlwg i ni fod llawer iawn o fanylion i fynd i'r afael â hwy o hyd, a bod angen gwneud llawer o waith gweithredu i wireddu'r uchelgeisiau.

Credwn yn gryf fod achos cadarn dros wneud datblygu caffael cyhoeddus yn flaenoriaeth glir i Gymru o ran gwerth am arian. Yn naturiol, mae llawer o bwysau ar gapasiti ar hyn o bryd ac fel cyflogwr mae gennych nifer o rwymedigaethau o ran Llywodraeth Cymru wrth reoli unrhyw newidiadau sy'n effeithio ar staff sy'n ymwneud â gwahanol swyddogaethau sy'n gysylltiedig â chaffael canolog. Bydd hyn yn galluogi Cymru i fanteisio i'r eithaf ar y £6 biliwn o wariant ym maes caffael cyhoeddus, a gallai helpu i wrthbwyso rhai o effeithiau economaidd posibl Brexit. Rydym yn cydnabod hynny.

Rydym yn deall bod angen ymgynghori ar strategaeth gaffael newydd, ond rydym yn pryderu y gall y sector cyhoeddus, ar ôl cyfnod hir o adolygu, fod mewn perygl o gollu cyfleoedd i wneud cynnydd mewn meysydd penodol tra bod yr ymgynghoriad yn mynd rhagddo. Mae e-gaffael yn faes, er enghraifft, lle mae'n amlwg y bydd angen gwneud rhai penderfyniadau prydlon pan ddaw'r cytundebau contractiol presennol i ben, a chytuno sut y caiff trefniadau eu hariannu.

Rydym hefyd yn parhau i fod yn bryderus am yr hyn sy'n ymddangos yn broblem o ran bwrw ymlaen â gwaith i gefnogi datblygiad y proffesiwn caffael yng Nghymru. Er bod yr her o ddatblygu gallu caffael y sector cyhoeddus yn mynd y tu hwnt i weithwyr caffael proffesiynol, mae sawl blwyddyn wedi mynd heibio bellach ers diwedd y rhaglen Doniau Cymru ac mae'n peri pryder nad oes set glir o flaenoriaethau ar gyfer y dyfodol.

Byddai'r pwyllgor yn croesawu eglurhad ar gynlluniau ar gyfer y rhaglen waith caffael. Byddai'n ddefnyddiol gweld llinell amser gliriach gyda cherrig milltir allweddol, yn ychwanegol at y penderfyniad penodol am y model contractio canolog newydd a'r ymgynghoriad ar strategaeth caffael cyhoeddus newydd. Hoffem weld hyn yn ymdrin



ag unrhyw ddatblygiadau perthnasol sy'n benodol i gaffael – gan nodi'r meysydd pryder yr ydym wedi'u harchwilio o'r blaen – yn ogystal â'r gydberthynas ag unrhyw gerrig milltir allweddol ar gyfer rhywfaint o'r gweithgaredd ehangach a ddisgrifiwyd gennych, er enghraifft ar yr agenda Gwaith Teg.

Yn ystod ein sesiwn dystiolaeth, soniwyd am faterion yn ymwneud â safbwynt Llywodraeth Cymru ar wneud y sector cyhoeddus yn agored i risgiau'n ymwneud ag iechyd ariannol cyflenwyr allweddol fel Interserve. Ers y sesiwn dystiolaeth, mae'r cwmni adeiladu o Abertawe, Dawnus, hefyd wedi mynd i ddwylo'r gweinyddwyr, a chyfeiriwyd yn y cyfryngau at sawl contract byw yn y sector cyhoeddus yng Nghymru (a thu hwnt).

Byddem yn croesawu rhagor o fanylion am sut y mae Llywodraeth Cymru yn gweithio gyda Llywodraeth y DU yn achos Interserve ac, fel y bo'n briodol, Dawnus, ac am y camau yr eglurodd Jonathan Hopkins eu bod yn cael eu datblygu i gynyddu gallu Llywodraeth Cymru i asesu risgiau perthnasol mewn perthynas ag iechyd ariannol cyflenwyr ar ran y sector cyhoeddus ehangach. Yn achos Dawnus, rydym yn nodi y darparodd Llywodraeth Cymru fenthyciad o £3.5 miliwn i Dawnus a bod dyled £1.5 miliwn iddi o hyd. Hoffem wybod mwy am ddiben cytundeb y benthyciad a'r mesurau diogelu a roddwyd ar waith i ddiogelu pwrs y wlad, yn ogystal ag unrhyw gymorth ehangach a gynigiwyd gan Lywodraeth Cymru. Yn y ddau achos hyn byddem yn gofyn am ddadansoddiad llawn o ba mor agored i risgiau yw'r sector cyhoeddus yng Nghymru ar ôl ei gadarnhau. Rydym yn debygol o ddychwelyd i enghraifft Dawnus fel rhan o'n gwaith wrth drafod cyllid busnes Llywodraeth Cymru.

Yn olaf, rwyf i, fel Cadeirydd, wedi derbyn gohebiaeth yn mynegi pryderon am gydymffurfiaeth â [Rheoliadau Contractau Cyhoeddus 2015](#), yn benodol adran 18 ar 'egwyddorion caffael'. Mae'r pryder yn ymwneud â Llywodraeth Cymru yn mabwysiadu polisi o ddefnyddio'r Cynllun Ardystio Sgiliau Adeiladu (CSCS) ar bob contract adeiladu cyhoeddus, sy'n gofyn am gymhwyster gofynnol penodol ar gyfer crefftwyr. Rwyf hefyd yn deall bod tystiolaeth y gallai fod yn bosibl nad yw cwmnïau adeiladu bach i ganolig eu maint wedi cael yr un elw ar ardollau Bwrdd Hyfforddi'r Diwydiant Adeiladu â chwmnïau adeiladu mawr.

Rwy'n cydnabod y gall fod rhesymau da dros fynnu lefel ofynnol o ardystiad i roi rhywfaint o sicrwydd ynghylch ansawdd y creffftwaith. Fodd bynnag, yr honiad yw bod Llywodraeth Cymru, drwy orfodi'r defnydd o'r CSCS, wedi lleihau cystadleuaeth yn artiffisial ar gontractau cyhoeddus os yw cwmnïau llai hefyd yn derbyn llai o arian i gynorthwyo'u gweithwyr i hyfforddi er mwyn cael ardystiad CSCS. Er nad mater i'r Pwyllgor yw penderfynu ar gydymffurfiaeth Llywodraeth Cymru â deddfwriaeth,



byddwn yn croesawu eich ymateb ar y mater hwn, gan ei fod yn berthnasol i'r materion sy'n ymwneud â galluogi mynediad i gontractau ar gyfer cyflenwyr lleol a chyflenwyr llai o faint.

Edrychaf ymlaen at eich ymateb. Os hoffech esboniad am unrhyw fater mae croeso i chi gysylltu â'r tîm clericio.

Yn gywir,

A handwritten signature in black ink that reads "Nick Ramsay". The signature is written in a cursive style with a long horizontal flourish at the end.

Nick Ramsay AC
Cadeirydd

